

四庫全書

集部

欽定四庫全書

雪樓集卷二十七

元 程文海 撰

詩

徐君允諧以長篇將荔枝為貺草草二絕奉謝
風雨作秋西齋兀坐細讀來章念不可不報
遂又次韻

荔支樓下繡衣譜授記傳來却到予得見伊家玉樹種
絕勝展翫樂天圖

何人日啖三百顆輕卸霓裳見玉妃自得君詩冰雪味
不知世上有甘肥

我行炎方見子都栗肌獻面身檉株中藏至美不自露
風姿皎皎隱煨爐土人謂此玉樹貴兵間幸不供樵蘇
李生五品竟汝遺太冲竊取夸全吳不材散木神所扶
有果可食終剥膚君不見深山毛犀絢文彩織毳寧免
充繡能大枝小枝折泄餘空留碧葉冬不枯塩蒸蜜漬
意可遠盛之寒露清水壺廟朝豈諳草野味猥以櫻實

當醞醐蜀珍曾被真妃汙此事頗近寧子愚東閩猶是
山澤臞遼遼道里懸中區倘經薦進亦爾耳始信禍福
相乘除嶺南酸薄同黔驢香山只作巴峽圖莫嗤齊人
識管晏知己賴有東家謨殊鄉殊嗜多受誣朔南酪茗
更相奴詭名好化赤松子甘液下注根豐腴

漳境向治流逋四歸弘道有詩次韻志喜

按臨建邵總稱賢又復深深入瘴烟自古清名能化暴
及今赤子得安眠如雲冠蓋誰曾識帶雨犂鋤爾自田

從此海瀕霑聖化吾曹追責樂餘年

寄賀弘道僉事改除江西

聖明初服選掄新易地觀風着此人會見西江民吐氣
久聞南嶠政如神只今察察情何極惠我鄉邦事亦均
說與山中吳處士清時錫汝保閒身

畏獨惠中秋詩次韻邀月共發一粲

萬里陰晴此夜秋天容竟日故幽幽要教好月特然霽
暫遣癡雲凝不收隱隱清光上東海堂堂勝賞賽南樓

作詩合共閩人翫
早放髯劉出一頭

夜深邀月不至悵然而睡
再讀來詩次韻以謝
天上人間各自秋
姮娥不管下方幽
暗陳瓜果充籩實
冷聽梧桐觸井收
已至三更仍抹漆
空餘逸興欲登樓
夢中桂影成金粟
癡絕前身顧虎頭

暇日偕行臺唐古特御史登九仙山

暫停驄馬共尋幽
倚杖鼇峯頂上頭
海淨潮平萬里眼
風光月霽一天秋
九仙定有重來約
三島寧無可去舟

古字苔深半明滅新詩聊復記曾遊

送弘道僉事之官江西

趙侯丰骨冰千層入眼壁立清且熒烏府當年小盛却
崇臺獵獵寒飈生清問顛崖辛苦急我亦直指江南行
雲龍上下逐東野謹論感激令人驚別來不作揚州夢
獨想豸角搖風聲浮雲聚散抑何定王事靡盬無留停
去年驅車下閩嶠驄馬却在西南垞關山明月長耿耿
遠欲見之悵未能邇來傾倒連床夜議論頗覺深逃形

書囊無底談未了一札又促飛鴻冥江山共恨留不住
私喜桑梓蔭餘清萱近北堂春日榮白雲望望雙眼明
我家有老且望八佖許錫類遺君羹霜風飄飄榕葉鳴
酒餞江頭須滿傾願言努力鋤荆棘浩歌天保荅升平

次劉雲卿御史同達勒達御史遊鼓山詩韻并序

方巖峯距城二十里而近欲一往未能也去歲禮
部王君寅夫獨遊辱寄詩盛談雲夢之樂僕亦想
像高唐以對今弘毅雲卿二御史暇日登高覽勝

紀之於叙寫之於詩使人心曠神馳恨不並轡橫
翔排埃壘而出廖廓也率爾用韻

登臨有約墮鴻冥拄笏看雲空復情笑我北山文久勒
輸君南岳記先成林深谷窈車聲轉海闊天高筆興生
何日得將塵俗耳倚欄同聽澗泉鳴

再次韻呈弘毅御史

驄馬行行出杳冥笑攜僚屬叙幽情陰森竹樹斐夷去
軒豁江山指顧成坐石傳杯懸瀑濺倚岩扶杖亂雲生

何時共卧超凡閣月滿空林翠浪鳴

寄賀盱江張監郡初上

帝錫盱城保障哉朱轡皂蓋浼雄才濟南書許人間見
博望槎從天上来聞道門庭清似水不愁田里冷於灰
同寅太守今劉寵努力驅車共輓推

送蘭與盱守劉東厓

結綬年時白玉京只今江海若為情蕭蕭六轡馳荒徼
赫赫雙旌擁大城桑梓何時容我住蕙蘭微意況君清

黃金橫帶渾餘事千載相期不朽名

郭梅西息齋

陰向秀萼測陽從小雪看千年啓龜蟄六月養鵬搏隱
几天機熟閉門人境寬悠悠八十返靜處得奇觀

題趙仲遠所藏趙大年鵝鴨圖

鵝鴨池邊畫作閑輸他鳬意幽閒王孫下筆厭羈束
移在長汀短渚間

題仲經知事家藏錢舜舉折枝

花鳥徐黃死不傳筆端那得許清妍錢郎狡獪老猶在
字畫翻騰作少年

題採蓮舟杯

攀翻葉上露釀作杯中酒可能君不醉負此摻摻手

題仲經所藏馬圖

食之三品芻豆飾以千金轡環誰能解棄微纆縱渠汙
渭中間

題仲經家江貫道瀟湘八景圖八首

平沙落鴈

翩翩數行下灘磧俯蒼波此處稻梁好人間矰繳多

烟寺晚鐘

僧定鐘聲緩依稀聽不真渡頭風正急喚醒未歸人

洞庭秋月

萬頃玻璃上輝輝玉一環望中青似粟約莫是君山

瀟湘夜雨

昏昏風浪裏瑟瑟打蓬聲騷客千年恨靈妃萬古情

漁村夕照

落日寒潭靜西風黃葉鳴
鱸魚新出網分我一杯羹

山市晴嵐

旂亭新酒熟下馬試從容
頗勝老兵對夕陽三兩峯

江天暮雪

六月三山底城中似甌中
客來開短軸亂雪舞江風

遠浦帆歸

八景瀟湘妙歸舟更色絲
招招煩小住我賦式微詩

題歸去來圖

春晴苦旱心如醉暑雨妨農鬢欲斑
眼底家山歸去好
吾生端的幾時間

送李副使赴行臺治書侍御史

暑風散霖靈宇宙一清快青驄金盤陀
夙駕趣行邁先
聲所震薄已被江浙外兩年七閩裏
赤手理彫瘵高明
副鎮密通綽主剛介清時簡賢哲
美績先奏最崇臺借
君重橫榻政非泰蹇余忝嘗僚朝夕得箴誨
瞻其塵埃

中矯首飛霞佩男兒附青雲肯掇鼠壤嘅浮榮一瞬息
醜好有千載期君天下寶玉雪善自愛

魏知事求樂閒字謾與一絕

人人忙裏羨人間到得閒時樂最難會着此心真樂處
山林朝市一般看

九日宿璜坑

重陽天借登臨便北上岡巒步步高馳傳觀風忘路險
無功及物愧民勞山深氣象涵千古風靜塵埃絕一毫

莫菊旅中無覓處明年何許約遊遨

十日山行午炊沖頭

上山竹輿下山行據鞍穩坐須路平豈惟人力欲調適
馬有肺腑亦求生閩山叢叢石壁立一嶺未了一嶺迎
峯回路轉蹊徑小上如登天下如傾隙中梯齒度田畝
亦有流水濺濺鳴老農終歲營一飽大熟會合論收成
我來行縣當九月風高雲朗氣適清平生心地一平直
見此巖險魂為驚僕痛馬瘡亦良苦未必原隰周隱情

箋天夜半借霹靂盡削磊砢除縱橫皇皇大道坦然共
四通八達朝瑤京

十一日活畬登舟十絕

天開圖畫作步障連日山行已大奇換得漁舟更奇絕
大年小景少游詩

崎嶇複嶺到江津倒卧舟中靜閱人山上海人昨日我
我思昨日始傷神

瀨頭流水綠如油急取春芽試一甌揚子江心堪伯仲

茶經從此合重修

頗厭山蹊百險艱
輕舸暫借一隅安
灘頭力盡不得上
行路人間是處難

江清照見石粼粼
貌得遊魚態度真
說與長年輕蕩槳
放他深處着潛鱗

上頭石壁下驚湍
一似龍蟠一虎耽
幽獨莫教方士見

山靈怕喚小仙宮

石壁一帶類龍虎仙宮

重陽落在萬山中
物色黃花杳不逢
天恐詩人要題目

江邊木末出芙蓉

山容彷彿似盱江亦有人家占夕陽
陸走舟行方未了
晨飡何日奉高堂

桑田滄海兩茫茫一道清流自久長
定有幽人在空谷
說仙說佛說文章

說仙說佛說文章自是山林不耐閒
試數聖賢名世者
話頭那有許多般

又五言一首

卷二十七
斷岸刀裁出清湍磬折流山尖微見樹石罅劣容舟羣
鷺驚人起雙鳬盡意浮哦詩忘行色征騎又江頭

板橋午食

縣郭二十里板橋三五家西風熟禾黍陸地富桑麻去
歲遭洪水高林帶舊槎他鄉豈不好無奈此生涯

十里頭

夾道驪迎盡古松龍吟虎嘯滿天風吟詩未就人攔馬
落向荒煙莽蒼中

次郭珙留遠大卿韻二首

鏤彩韜光幾歲寒深叢依舊炳斑斑心如止水絕點滓
屋與閒雲分半間蹤跡久疎客城府篇章聊復主溪山
後生不識龍鍾老少日聲名播九寰

閱人多似粵中山客有可人千一難驚見貞元朝士在
敢同絳縣老人看珠歲大澤祇自媚木卧空山不受寒
朱墨沉埋無好語和篇首首出衷肝

次韻王蘭思

月露精神入筆端
冷然雅韻洗毫蠻
知章清味鑑湖水
弘景高標句曲山
炊黍功名隨舊夢
種蘭歲月自蒼顏
何時乞得身無事
分取閒雲一半閒

百蝶圖

政爾翩翩去其如
栩栩何夢中
千億化未覺
百身多

張萱唐宮搢練圖

月杵輕揮快似飛
霜紈熨帖淨輝輝
詩人不識畫師意
微詠周南澣濯衣

書月樓

長年南北事馳驅閒却西樓架上書
削迹市朝專靜退羨君事業付乘除
神光清夜照千古素魄中秋朗太虛
我欲借眠還肯否靈明回向此心初

次韻張仲豪御史見寄

荔支熟後與君違羅髻猩紅又及期
官冗不知為客倦詩豪猶足起吾衰
田園疊疊生歸興江海悠悠感舊知
千里相思無以贈明時行道復奚疑

荅王魯山

江海交游白髮新，眼明猶及識斯人。
縉雲氏接三皇舊，鳧繹山藏萬古春。
舉世誰能容毛遂，高風今始見元賓。
秋光未老黃花健，把酒相期萬里身。

荅張仲豪御史

山川相望風烟隔，寒夜時時夢見君。
焜耀繡衣浮紫氣，崢嶸椽筆倚青雲。
月隨淮水明千里，春減江城凍幾分。
老我三年閔粵國，無才何以稱斯文。

韓孔惠孝廉挽詞

杜門三十載辟世抑何嚴身隱一時屈民彝萬古瞻徵
君宋康節處士晉陶潛題墓真無媿三山韓孝廉

寄題李總管効忠堂

恭惟湯武師仗義行以仁阿衡相鳴條尚父翼盟津霆
聲纔一鼓六合皆陽春後來用武者草管視其民功成
荷圭爵萬骨隨荒燐懷哉平江南時有臣如彬焚香對
士卒誓不戮一人至今青史上厚德誰與鄰天朝大一

統皇靈被無垠桓桓巴延公秉鉞兵如神舟揚有澄波
矢落無驚塵策勲談笑間視彬亦其倫誰歟贊籌幄李
侯兩經綸拔釐起襄樊一掃雲雷屯論功冠戎幙蚤合
登要津胡然二十載尚爾朱兩輪皦如一寸忠寢飯常
書紳為堂識不忘巨扁高嶙峋邇來又遷轡三載建水
濱清譽播海隅最聲徹嚴宸我聞忠之報豈止在一身
斯堂貽子孫千古長如新高門矗霄漢華屋如魚鱗金
珠醉夢中歌舞紛前陳誰持片曝心惓惓到君親感茲

名堂意肝膽增輪困窮為畎畝士達作廊廟臣功名儻
來耳命義當自珍我語如可采庶幾附堅珉

次韻張仲豪御史

世塗九事八欺謾安得春風處處懽人徯銓衡字物論
我知玉雪在臺端心游肯綮屠牛易眼著驪黃相馬難

紙尾不為子木署要留選格與人看

宋以蔡廓為吏部尚書廓謂傅亮曰

選事悉以見付不然不能拜也亮以語錄尚書徐羨之
羨之曰黃散以下悉以相委廓曰我不能為徐子木署

紙尾

為曹仲堅題漁父圖

風烟浩渺浪拍天百帆齊開爭一先輕舸蕩漾自來去
詩人曾賞古漁父山圍別浦樹參差水淨沙明人迹稀
大罾小罟較得失魴鱖暗作枯魚泣直針為鉤餌亦無
烟波不見真釣徒林中茅屋是誰子袖手無言方隱几
李憲甫敦好堂

如許聲華重情知計未能臨池思靖節愛石讓平泉此
事凌千古斯文繫數椽相逢敦友好心誦大夫賢

書郭將軍墓銘後

不用汾陽拜將軍
閱世深虎頭當日相馬革老年心
穎自囊間出詩留槩外吟能文欣有子安得過山林

送余率翁秩滿謁選并寄容齋承旨肯堂學士

江南四月梅子黃
衣袖已試荷風香出門有客欲萬里
使我憶得西山蒼
西山何處雲半髮夜深斗極回寒芒
磴泉自紅澗自碧樓倚白雪歌滄浪
容齋遂慵兩相好
劍氣耿耿龍騰驤
我曾握手極千古逢之滿腹生琳琅

曉天一笑江水長燕鳴岸雨催牙檣

別余琅山教授

憶昔京華別誰知碧澗來一杯春事老兩度冷官回喜
色迎椿樹明時仗杞材可能瓜熟巧綵袖照蓬萊

皮充齋挽詞

宦籍公侯貴鄉評齒德尊卷舒民寄命生死客填門美
譽空遐想遺文欠細論傳家詩禮在賸馥茂蘭孫

送黃友章過南浦并寄蕭許二提舉

咫尺朱簾外梅黃正釀酸谷雲雙井濕江月一天寒懸
榻留徐穉開帆借子安斯文有宗主慎勿歎儒冠

上官秋旦挽詞二首

妙年植門戶壯志就功名汲汲尊倫紀諄諄似老成文
功同武事茂實發英聲太息天何遠摧殘到紫荆

黃金臺畔路文彩憶鵷鷺大雅淡無語諸公爭欲官可
憐蒼黛色不及雪霜寒賴有新詩在江湖興未闌

題趙雲趣梅圖

燭龍一步九徘徊
便恐昆明煖作灰
避熱雪樓無去處
天留半樹補之梅

題傳雨岩所藏蕭臺二賢與雞山廢和墨跡
蕭臺二妙競當年
下筆曾期百世傳
不是傳家敦世好
只今誰與拾遺編

題傳雨岩所藏劉龍洲與牧庵廢和墨跡
四海龍洲客
三生杜牧之
篇章唐大厯
人物宋淳熙
雅道還諸老
風流自一奇
雨岩寶遺墨
先友百年思

黃有山挽詞

江右多文獻夫君獨槩量一官相始末十載了存亡夜
月閨闕黑秋風盱樹黃有兒終大事百世此桐鄉

曾寄憲千戶挽詞

家有元豐彙逢時又六韜水鳶從霧潦鞍馬尚風騷王
府奇斯士皇恩選爾勞中營妖石隕新塚戢畬高

次韻王楚山見寄二首

歲寒特立憶長松陡覺龍蛇落眼中學問青箱傳嫡派

詞華白雪尚鄉風
田園到底還元亮
城府曾先識德公
矯首詩筒頻餉我
草書元不碍匆匆

江山信美重登樓
歲歲年年客裏留
遠景記成懷蜀里
孤雲望斷感邠州
白鷗江上天連水
黃鶴磯頭月滿洲
歷歷楚山青不老
幾時握手話曾遊

送黃隆吉司獄

兩辭有生死司獄
定初情慎勿卑官
職徒然記姓名如
君自良吏佐邑著
能聲章責修何行
行看獄市平

送嚴春山

不是春山無釣磯
要將喜色動慈闈
一官豈為蘇洵冗
百里欣同李路歸
椒酒儘堪為壽獻
梅簷趣得未花飛
斯文衡鑑明公在
千仞岡頭試振衣

陳中方挽詞

秋風蟻戰萬人看
回首真成半夢間
博得風流歸泮水
任將文物起賢關
青衫纔著陵遷谷
紫紵重來日薄山
阡送南陽家咫尺
梅花寒絕淚潸潸

鴈塔李君攜草廬記來索詩戲題二絕

看了除書損道心
浮屠何事著虛名
華山處士多閒管
記得麻衣三字評

君來喚醒少年狂
淡墨春風鴈幾行
塔頂夜寒星斗近
尚堪為我說文昌

曾勁節惠梅二首

任他桃李滿人間
千載心期托歲寒
儘有江頭佳實在
不妨身作老龍蟠

癯仙歡舞送春來
醉我新筍白玉醅
索笑花前誰與共
一尊合為主人開

趙安宇惠梅二首

何必園林欲雪天
問渠交友已忘年
尊前一笑成珠玉
知是詩仙是酒仙

誰遣飛虬下九天
人間小住却千年
祇應標格孤山似
肯與移來配水仙

曾勁節挽詞

愁絕寒蓬對此君尚疑月夜有歸魂黃梁夢裏常平粟
晚節香中獨樂園養志從來誇有子問安誰復辨諸孫
千年馬鬣知何許不盡春風淚一樽

題靖夫弟畫屏折枝十二首

紫牡丹

豪貴說長安爭先紫牡丹我無池館地畫與子孫看

梨花

神清體綽約雲淡月朦朧道是玉環似輸渠林下風

雞冠

瑤臺歌絳幘祇欠一聲啼獨立西風裏由人喚木雞

月桂

本是堯堂英翻為月月紅殷勤煩好手移向玉除東

碧桃

紺髮綠毛冠瓊裾縹碧衫人間何處着除是補陀岩

黃蜀葵

玉杯蒸栗色那得許精神稽首黃金相天然妙色身

櫻桃

雨洗紅珠重香浮乳酪寒筠籃風味在消得赤瑛盤

來禽

翡翠圓成彈臘脂與點腮園丁休盡採怕有衆禽來

梨子

滿面黃金粟盈科白玉漿可能燒二顆口腹累君王

石榴

朱房含玉醴玳殼錯金鈿不枉煩符節崎嶇十八年

木瓜

珍重宣城貢瓊瑤直得詩霜餘風韻在細字寫臙脂

枇杷

翠葆擎珠琲金丸貯蔗漿雪中記高樹花發傲羣芳

跋段立夫詩卷并序

予初識段君立夫於南臺持憲嶺南甚有聲予使
閩嶠不相聞五六載矣問之則曰寓武昌也自閩
還盱君適來佐盱郡以一道清澄之才行千里牧

養之政一府之視聽為之新予寓於是而官於是者得見如斯人焉如之何不喜暇時輒相從意謂可以忘老也而予又被命有湖右之役君舉酒為別且出示武昌一時名人送行詩卷學士姚公端夫叙實居其首予行匆匆不能悉已然君之不讐不戚不待端夫言而後知之也方今聖君賢相在上用人必當其才如君英英豈久沉郡僚底哉將欲為盱民借君一年恐不可得繫二詩於卷末以

識別後之思云

君從武昌來我又武昌去南樓秋月高永夜望母
君如霜後鵲繫此轅下駒借留亦我意匪朝有除書

壽萬媪九十八歲

康強九十八歲壽四子一女俱耄耆身見曾玄共五世
一門二十四男兒阿誰積此善者慶萬母鄭姓家青綏
此誠希有合旌異有未省錄徵吾詩

送白敬父赴江西理問

斯人官此孰能知江漢天成一段奇南國樹能思召伯
西風塵豈為元規相看未穩渾疑夢一笑無何又別離
好汧澄江吾所飲思君還讀寓齋詩

題張知事所藏王黃華墨竹姚雪齋詩卷二首
黃華不見見琅玕蒼雪紛紛六月寒盡日搖毫描不就
若為持與墨君看

軒髯猶記雪齋老筆法詩情兩入微莫怪再三開卷軸
近來耆舊眼中稀

送蕭深可尹淑浦就呈分司郭西楚僉事

荒服今州縣提封古子男
瀘溪遺愛在淑浦去程諳
尚續台衡八何妨令尹三
林宗方問俗氣象故渾涵

題雪寺歸僧圖

石頭元路滑更着雪皚皚
不敢辭辛苦諸方應供來

奉餞學舟老先生之武陵

疾風吹雲雲不裂南紀酣酣三日雪
辰陽冷掾故不冷破帽棕屨來作別
先生自是我輩人錦袍丹紱曾青春

黃金築臺不肯上水晶宮中一角麟一朝忽着儒冠起
泛宅浮家五千里繫船花岸茹蒸霞爲展臯比說詩禮
仲尼未始三年淹我亦鳴榔下湘水蕭雲曹志上所知
銓量當遣教五溪先生行止無不可瓜期况爾來遲遲
問君此行何所之武陵思我還當歸是間少長致足樂
采花食實薪桃枝落日天低洞庭野木葉蕭蕭風上下
留君小住君掉頭前有十槳先饋者蒼蒼烟水解迷人
莫倚川原物色新漢家會有蒲輪使珍重脩程穩致身

燕五峯右丞用安總管雪詩韻見貽次韻二首

開門鷺羽舞僊僊時序崢嶸又一年萬象好看俱幻處
兩儀渾似未分先插空粉筆誰供畫散路銀盃不直錢
狐兔只今難遁跡長方俊鶻快三田

五老峯頭不老僊詩來喜雪兆明年閒吟公自如忠獻
懶讀吾方似孝先杯酒賸思澆磊砢街泥猶惜濺連錢
斯時雅稱官居冷帽擬僧伽衣稻田

燕五峯詩附

比見諸名勝所贖安侯雪詩病中偶成兩章

錄呈一笑

疑是瓊樓上界仙散花布地又年年玉龍松老猶擎
重翠羽梅寒敢占先甲冑戍邊思挾纊貂裘換酒不
論錢舊家風味都休說預喜豐年賦大田

銀潢剪水出天仙此瑞今無二十年南紀歡騰三白
後北枝春遜六花先此時沙漠應如席曩日京都屢
賜錢臣子願豐無補報負丞祇恐愧藍田

再用韻敬謝佳句之辱

凡花頃刻未為仙
天上瓊花占大年
饒斲黃精憐我老
詩成白戰覺君先
吟窓祇想銀河瀑
凍屋空驚玉蝶錢
稽首君恩同一飽
明年我亦賦歸田

高寒驄馬自神仙
擎玉風標見盛年
梁苑賦成驚歲晏
郢樓曲好占春先
爐灰我愧懶殘芋
茶沸君高陸羽錢
忽憶西江攜手去
漁簑江上看瓊田

次韻奉酬趙儀吉并東問嘉會陳孟實

雪灑溪藤卷復開，雙魚能為故人來。
一官水國家千里，三谷山房夢幾回。
安得清遊繼韓孟，喜聞白戰起歐梅。
歲寒亭下春初折，試嚼君詩喚一杯。

又題歲寒亭

吾廬不暇理，且復理斯亭。
風雨從渠破，雲山送我蒼。
龍千歲質黃鶴，九霄翎相與成。
三友今年聚德星。

題廖克讓所藏喜酸圖咏木畫卷二首

甕天從蚋集，駢首欲何為。
倘使真知味，應無浪皺眉。

山禽啄木響野客抱琴看我有芳春調無人為一彈

送禮部侍郎喬元朗使安南

一士賢於萬甲兵文星兩兩使星明林箐北戶迎霜雪
江漢西風送旆旌道路只今如咫尺男兒從此見生平

經行賸著奚囊貯更恐驩州有貢英

唐賢相安公
日南貢士也

寄閻子靜唐靜卿二翰長

故人天上近何如白玉堂中足寶書燭徹宮蓮三鼓後
露溥仙掌九秋初江湖政共丹心老魚鴈全如綠髮疎

西北闌干天咫尺欲乘黃鶴却躊躇

因羅冲夫行寄臧魯山二首

夢裏西江潑眼青隔林遙見繡衣明
覺來得句無人寄恰有新秋鴈一聲

兩鬢清秋半席風歸裝無物有詩窮
南樓那似西山好十二珠簾捲雨中

確齋侍御見寄方鏡新篇奉和二首

老我平生坐惡圓又因秦鏡得新篇
一方明月恰如此

幾載磨磚竟炯然不必虫魚銘表裏定無麈鼠鑑姪妍
憑君穩著高臺上為助清光照大千

挂壁從教鬼魅驚誤隨書劔又江城神光內照初無用
仙藥重磨漫有情此日容顏誰老大向來肝膽自分明
蕭蕭萬象秋經眼安得同看更細傾

與郭西埜

并序

家有小屏帶一相傳寶晉齋故物得之有自宜不
妄也敬歸之西埜主人共服玩之萬一雖元章或

未足婉盛美而是物遷徙去來每不失所托政可
為此帶賀乃詩以送之

書畫船中物文犀獨未銷通天從過眼辟惡且圍腰尤
物今何幸伊人故自超願君勤結束早晚立清朝

次韻寄謝譚梅屋四首

盡日馳驅尚自強得詩題案復題牆梅花正繞深深屋
不記麤官薛許昌

寒溪對月影成三千里相思北斗南石白窪尊無限意

譚君殊憶共君譚

平生吾亦愛吾廬松桂成行蔽芾初料得山中人笑我
豈無熊掌去求魚

洞簫聽遍韻能和小為諸君更倚歌須信新詩如白髮
一番離別一番多

次韻寄謝郭梅心三首

幼農

摩壘誰如此敵強平生屈賈為君忙已尊詩律今功父

更識交情古子桑

甘棠池上

羊角峯前水墨池
歲寒心事幾南枝
可憐獨見蒼藤面
又值春醒未解時

社日

詩課無聊謾日供
不如初震醒羣聲
武昌樊口春寒夜
夢嚼梅邊雪片鬆

耒陽譚子實出少陵祠古今題詠求詩就題其

後

金粟無人酹夕陽
來江行客奠椒漿
風騷何與乾坤事
山水長涵姓字香
蘭畹大夫空浦溆
錦官丞相有祠堂
遙知一一忠魂在
來往乘雲共帝鄉

用從周學士韻奉題竹岡二首

淡墨重看帶路塵
去年今日正行春
不知誰有千竿玉
我欲林中著此身

江湖滿眼嘆殊鄉
寒碧沉沉華子岡
輸與咸寧吳令尹

此君長伴兩相忘

餞詹御史

相知不在早所貴得此心馳驅三十年見此玉樹林蒼
蒼古顏色蔽芾喬木陰豈無雪與霜獨覺春意深懸知
棟梁具不受寒暑侵高枝有逸響聊以驚凡禽誰云節
目多正直神所欽清風為我彈明月為我斟非酒味已
長無絃誥知音我欲罄一歡回首千雲岑願共千歲期
昂霄政駸駸

寄尚參政

黃鶴山前舊使星十年今在泰階明
西江紫氣南樓夜長凭闌干到五更

江天暮景圖

昏鴉零亂掩荆扉烟樹微茫水四圍
我願卜鄰還要否門前恰有釣魚磯

題段郁文所藏錢舜舉畫二首

梨花

一枝寒食雨落紙不沾濡他日成秋實還能寄我無

白菊

黃中雖正色潔白見芳心折得無人把何如晚逕深



雪樓集卷二十七

欽定四庫全書

集部

雪樓集卷二十八

九

詳校官中書

臣

羅錦森

侍讀臣孫球覆勘

總校官庶吉士

臣

朱鈐

校對官編修

臣

楊壽楠

謄錄監生

臣

王泰雲

欽定四庫全書

雪樓集卷二十八

元 程文海 撰

詩

次韻廣西王景韓憲僉見寄

江漢飄零一夢初，少年心事了無餘。
雙鳬乘鴈妨賢路，五柳孤松憶弊廬。
黃鶴樓前塵隔扇，碧蓮峯下雨隨車。
新詩乍見如公面，有使頻將慰索居。

次韻郭西望見寄二首

我本山中一倦民，出山猶幸挹真醇。
何妨共結雞豚社，鬪取樽前見在身。

自別君來肺欲塵，清泉那得取諸隣。
夜來夢與山靈語，華子岡頭見異人。

次韻盧疎齋就以贈別二首

百川晝夜流，萬折不能止。
羣山勢崩奔，終古乃在此。
人生費推輓，三嘆中夜起。
瀟湘有佳人，朗月鑑秋水。
思之不可見，曠若隔千祀。
相逢在歲晏，使我寢食美。
又言當

遠別東去數千里何由小躊躇招招彼舟子

芥拾琥珀針不言自相得留君我無辭送君我無力願
君加飡飯努力崇明德江空餘深寒出入慎扶翼梅花
照清潁夢寐耿玉色矯首東南雲金門幸回憶

寄王寬夫侍御

墨池曾別右軍來回首何時笑口開昨夜東風吹好夢
故人今上鳳凰臺

寄趙子敬治書二首

父老猶能記福星煌煌今在太微庭五年江漢烟生土
惟有甘棠一樹青

南北參辰十五年狂奴狂態故依然何時握手平生事
夜夜南樓月滿天

寄潘景梁都事二首

渺渺美人天一方思如江漢不勝長東風喚起三山夢
月滿庭花幾樹香

憔悴江湖見在身十年前事只清塵鳳凰臺上闌干曲

應念天涯有故人

觀空軒

焚蘭登上方倚策得幽觀塵心一昭曠風條正凌亂道人欲觀空花臺對香案融融雨初潤靡靡春將半未詳姚與魏穀葉珊瑚榦豈無豪貴惜亦有子孫看風光本何有可愛不可玩殷勤道人心邀我揭柔翰故知非佛事聊用標讚嘆無根優鉢曇過眼河沙算書成小窺簷紛紛現霄漢

舜舉畫棠梨練雀

霜暈棠梨臉風梳練雀翎含毫心欲醉開卷眼還醒

送孟子周御史

翰林逼華蓋學士如堵牆我昔從東來白鷗入鵷行又
如彼棲苴稊米於太倉無補舜裳衣幸識堯文章孟氏
古作者周鄒漢平昌當時梧竹間鸞鵠今高翔瞻前忽
在後復若揚粃糠相知始相識此樂殊未央非無酒與
肴三嗅不肯嘗英韶發孤奏二柏失老蒼何以傲歲寒

篋笥留耿光何以慰別懷願保濟遠航

送劉欽夫御史

乘驄萬里行光華動南極江漢及早春草木皆喜色欽
夫吾所欽握手如舊識詩書與禮樂談笑出珪璧寒亭
列山尊我欲勞遠客再四招不來威鳳方覽德使我心
慙而無以見雙柏忽辭黃鶴磯迤返烏衣宅瞻言在中
河杳杳浪花白天空雲水闊欲送無羽翼輕舟行順流
頗以戒潮汐努力重明時壽身壽家國

周耐軒總管挽詞

總角誇神秀，懸車見達尊。
雙旌傳宦學，千里賴生存。
馬鬣山扉夜，厖眉總帳昏。
歲寒留屐齒，淒斷不堪論。

鄧中齋挽詞

中齋吾所敬，一別幾飛螢。
栗里藏名字，歐鄉有典刑。
龍蛇那起鴻，鴈已冥冥。
淚眼河汾迷，猶占處士星。

送劉仲誠歸潯陽

不見匡山久，高人得飽看。
遺民甘入社，中允竟辭官。
南

極光芒逼東風紫翠寒君歸煩問訊五老近平安

寄郭西楚憲僉二首

風淨看花陌上塵遙知露冕正行春
麻姑定向方平語
三十年來第一人

投林心似後棲鴉黃鶴留連老歲華
千里家山棠蔭好
春風何日岸烏紗

送尹生歸江西

江漢秋深鴈過稀悠悠歸思夢先知
輸君去住無多事

顧我留行待幾時
野岸曉光千棹急
平湖寒影數峯欹
拍肩試向洪崖說
倘有黃花覓一枝

家山飛雲圖

吳雲楚客兩羈孤
我亦先人有散廬
風雪江湖歸路遠
不知誰為寫成圖

次韻程文卿并東憲府諸公

歲晚江湖一舸歸
故人水驛寄新詩
風霜客鬢非前日
水雪梅花似舊時
閩嶠十年常在望
西山千里重相思

喜逢官府清平日林下從今生有涯

寄陳止善繡使

王春煦萬宇八使來宣昭使君古德星所至聞虞韶憶
經沙羨陌弭節睠久要相望江北南鄙各一日消漢江
鴨頭綠奉以磊砢澆驪駒曲未終渺然但清飈匡山綵雲
起繡衣已當霄迢迢江閩際往往山岳搖豈意桑梓間
猶得親華鑣衡門劣容車聊以永今朝至今聲歎留使
我神思超瞻言既匪易既見終成遙遙知按行處氣壓

滄海潮緒經有晉石水底字未銷山靈知素約寤寐苦
見招使君幸踐之母謂方乘輅

次韻王山仲見貽

清退庵中老風流昔所親江雲猶薄暮宰木早先春文
采傳家舊詩章發興新朝宗秋水在去去自知津

次韻王子炎見貽

每逢佳句百憂寬頗覺鷗盟尚未寒傳語烏衣兩公子
頻抄新作寄人看

西湖小景

一片無情水笙歌日日春至今圖書裏輸與眼明人

送南豐曾敬齋學正歸省

芹藻香中識歲華滿懷霜橘苦思家來時勝載螺江酒
要及枝南第一花

畫牛

鰕鰾春來苦羣兒未必知良工如有意好寫駕犁時

張山泉自愚莊來往仙岩

曾宿喬林絕壑邊月明終夜聽山泉
宮商斷續初無譜
欲問張君借五絃

甲辰秋三谷山房落成次入韻二首

隨牒年年東復西歸來結屋傍叢祠
詩書何地不千載
山水於人有宿期傳後莫忘初葉祖
落成恰是菊花時
君看石上晉人字一一琳琅金薤垂

書是先人屋壁藏牙籤重理鎮山房
一爐香火見尊祖
百世兒孫尚肯堂著在名山期衆共
向來遺愛豈民忘

詩成難盡意中事石磴蒼蒼澗水長

送益清陳君

齒宿如何意更新黃花清露共精神絕憐康樂經行地
還遇淵明行輩人樓對夕紅誰拄笏澗涵秋碧暫垂綸
區區太史占星聚不見高陽有後陳

次韻趙卿月見寄

林泉遺世味幕府念平生尺玉偏勞寄雙魚不忍烹有
山隨李廣無酒飲公榮戲問朱簾客應知暮雨情

用前韻送閻伯雍

期子銷殘臘寒江水又生宦途謀北運客味厭南烹早
就金門獻先看玉樹榮家公應問我泉石正關情

題畫屏折枝十二首

牡丹

天香銷卯酒國色艷朝暾無地堪池館留看到子孫

雞冠

旌節餘空樹金錢失舊妍蕭蕭風雨夕獨立登貂蟬

梨花

清香發妙質皓齒映明眸惆悵東闌俗移來白雪樓

長春

生意春長在人間自四時紅衿映肉色消得簡齋詩

黃葵

金碗傾初日檀心颭曉風殷勤挹黃露擬進建章宮

碧桃

平地碧雲起明璫冠翠蕤種時和玉露折處宴瑤池

來禽

婀娜骨仍瘦勻圓韻有餘折來配青李如對右軍書

梨子

玉屑金莖露蒙之絢色裹霜刀為發部內熟得真游

枇杷

磊落黃金彈梢頭萬顆饒詩人如識面未必賦椒聊

木瓜

糝糝金沙面宣城出貢餘倘令和鼎食豈必愧瓊琚

櫻桃

百顆輸先獻圓疑火齊甘赤瑛盤裏好味不改筠籃

石榴

珠囊碼碯裏玉醴水晶房三嚙華池潤仙家辟穀方

送章明叔

相看未足又相違鴻鵠東風接翅飛兩槳吳船人易遠
一篙春水鰕初肥驚心幾度經年別握手何時萬里歸
早向斯文收汗馬華岡南岸有漁磯

寄陸義齋憲使

關山不碍暗香來
枝北枝南樹樹開
花外有人持漢節
尋詩應上越王臺

寄姚牧庵參政二首

黃鶴山頭楚觀鍾
喚醒陳夢欠從容
歸來坐聽春林雨
還憶簾前翠萬重

牛斗之間氣更明
三台星裏見文星
滕王閣上新碑刻
處處人家有素屏

陳氏山居書院前剏橋名道山

共說山居好烟霞幾許深
架中書有種橋下水無心
酒聚陳遵客花留蔣詡吟
宿春應可到吾亦慣登臨

補之畫梅

開卷見橫枝逃禪不可期
忽思霜月夜獨坐小窓時

陳小庭求詩戲贈

羊角峯前擬峴臺
竹林深處小庭開
遙知日日吟詩苦
損却空堦幾寸苔

李生北行

白玉堂容四海黃金臺貯千年好去江南年少薰風一路朝天

麓石圖

雲根無數壓溪灣萬里攜來只等閒我有澗邊蒼玉筍如何空寄夢魂間

送霍可與晉卿理問

素履詩書在明時獄訟稀鶯花梁苑酒金紫老萊衣外

省分天綽南河近帝畿平反須作意回首是黃扉

劉敬之尚書挽詞

儒效通今古尚書獨邁倫風沙臣節苦禮樂國容新地
隔龍泉夜庭留玉樹春曲終無限思併憶舊平津

白无咎素軒

下基厚地上高天饑即加餐困即眠幾度詩成還閣筆
恐將文字浣天全

少陵春遊圖

杜陵野客正尋詩
花柳前頭思欲迷
一樣東風驢背穩
曲江怎似浣花溪

喬達之畫江山秋晚圖三首

遮日西來正暮秋
買魚沽酒醉船頭
如今見畫渾疑夢
知是南湖第幾洲

千山木落鴈飛初
樵屋漁梁路有無
京國貴人真巨力
盡移生計入新圖

別來事事可名家
獨我空添兩鬢華
天際有山歸未得

遠峯休着淡雲遮

寄題終南遇仙宮宮在甘泉之下漢陂之上

甘泉祠祀漢陂遊盛事曾傳古雍州故國風雲逢聖世
化人宮殿倚高秋神仙可學妨吾懶詩句難成愧客留
聞道終南多捷徑定應容易到崑丘

李氏奉親圖

高唐李家宜入史世世順孫并孝子今人創見古尋常
養志承顏政如此春風秋月花滿川小車長耳相後先

生綃二尺粉墨具中有至樂無由宣坐中親賓歌拍手
宇宙之間一尊酒黃犬東門竟不歸青牛西去知存否
何如我翁八十強紅顏雪鬢雙電光醉歸不怕驢自穩
有兒左右扶車箱長聞貞觀開元際老大昇平飽嬉戲
丹青不見見殘編好護新圖示來世

鳳林李以翁教授父主簿公行實

場屋知何事丘園有宿儒一官聊慰藉萬竹自蕭疎玉
樹春回後黃花酒熟初典刑今益少五字當生芻

文明門外劉氏野春園二首

杜曲桑麻韋曲花青山遙共酒旗斜閒時也欲尋詩去
長夏門前第幾家

東風如海畫難真沁水平泉遠近鄰却是野亭春最好
題詩題字有聞人

石上三生圖

圓澤峽猿精也其歌可見然古今皆無人及之

巫峽三聲斷王城一夢回坐橫牛背穩不道故人來

雪騎圖

都城五月已炎歊咫尺西山迹謾遙何處只今如此雪
煩君小住我聯鑣

張子惠院判孝顯堂

日出北堂護草綠冷艷生香蔭華屋荊花七樹樹樹高
一一種時如種玉主人今住天中央曉從西府朝明光
歸來一曲塤荒合共羨張家孝顯堂

寄題吳氏晚香堂

樞山有高人樵歸得秋菊種之清溪岸繞此白雲屋華

滋無早晏所貴受命獨朝來濃露下芬芳出岩谷未知
叢上金何似庭際玉更欣萱草長色入眉鬢綠松桂相
與榮棗棗況已熟東籬一尊酒千載有餘馥願保黃中
姿餐英寄遐躅

冰雪相看堂

每過高堂意颯然却疑身近廣寒邊雲霄直上無多路
冰雪相看別一天勁竹喬松心有託方壺圓嶠畫難傳
六街紅透炎官傘借我風櫺一榻眠

次韻王寅夫尚書述懷

皇家盛制作後進殊未諳眷言廊廡老有如車指南高
者秩天秩下以商周參恭惟建官百佇之錫命三君懷
秋雨霽空碧何恬恬北南三十年取世亦已廉近聞鉅
鹿下一駢駕兩驂復言江漢民船尾紛相銜競迎新使
君使君裝已嚴皆喜遇好官清介侔張堪誰知跂望久
各抱空歸慙華國賴典刑潤下資流謙五字賢長城何
幸獲或擔傳之寄千載雅頌俱滕絨願言隆鼎彝無窮

在遷談

解安卿惠紅藥嘉種

風翻花藥春當階平生謝朓縈吟懷我還于京三百日
空庭枉費東風來人言秋半宜求種公築私園勞僕從
集賢解君解我心對面珍叢肯移送狂香浩態根裏藏
露珠葉葉凝恩光主人帝城東畔住一花一木都向陽
知憐我屋偏城北雪早霜多禁不得行行遶徧屋西東
旋為佳人覓住宅手提井華不敢澆造次恐傷黃玉苗

天公念花仍念我夜深暗雨鳴蕭蕭復疑猛洒蕪繁滴
拂曉來看三歎息初逢無以效殷勤佇待紅燈照瑤席

胡紫山挽詞三首

一尊淮海話相逢抵掌揚眉四海空落日遠山依舊紫
眼前回首但霜風

名節曾趨供奉班許教孤鶴綴鸛鸛鸛鸛不肯尋常出
孤鶴無端自往還

太息何人似此公未輸天下頌中庸何時絮酒平生足

蒿里三章一夢通

贈燕協律

洞庭之野有遺音
木葉蕭蕭自滿林
欲向此中尋節奏
天空人遠夜雲深

蒙節婦

江上山頭望夫石
當年顏貌誰曾識
行人疑是復疑非
長使往來緣絕壁
何如秦中雷寡妻
少攜雙稚留空閨
征夫不返頭雪白
旌表在門囊有詩

牟陵陽八十

陵陽先生八十時白鬚紅頰身深衣青門瓜熟有伏臘
磻溪釣直無是非門前載酒欲問字亭角倚杖方尋詩
少微政爾光不夜高士若匪先生誰

題祁提點秋山圖

仙人縮地古今同何處移來水外峯我與白鷗曾有約
可憐相見畫圖中

贈接花孟老

看朱成碧酒闌珊更訪街西白牡丹今日看花人白髮
接花容易接春難

題高彥敬烟嵐圖

西南多連峯東北多大野大野少人耕連峯有人寫寫
之給卧遊誰為識真者獨有房山公癖山如癖馬向官
浙河干收拾不盈把雲烟何慘澹水木亦蕭洒匪徒妙
丹青秀句蔚騷雅胸中殊磊砢筆底聊復且君看諸可
翫何者獨非假削平藝稻梁庶以飽天下

樺陽谷十韻

樺陽谷

天上官班地上行
樺陽泉石託幽貞
自從再踏蒼龍尾
每望西南眼倍明

養浩堂

不向高堂日擊鮮
歸休何以度流年
紛紛移體兼移氣
獨對青山養浩然

向日亭

寬閒何地不容光況是親扶日轂長未信城南天尺五
每家亭樹對朝陽

招隱亭

不見朱欄十二千遶簷叢桂想團團但招雲月休招隱
雲儘無心月耐看

貯月溪

水底空明透幾重溪光全似水精宮可應只貯涼蟾在
無限魚蝦亦見容

靜芳池

風裳水佩錦廻環
南蕩西湖六月間
却是主人心更苦
滿衣秋露曉凭闌

代竹園

遠近蒼雲接水雲
沁園花許鴈來分
當時淇澳青青草
千載人言是此君

比德泉

泉將比德德無涯
相映相輝玉絕瑕
一尺自渾千丈潔

下寧流處莫淘沙

鬪榭軒

槐棘春風日夜新
檻前山木老能神
兩賢豈是真相厄
大樹將軍此後身

肄射坪

觀德仍觀絕藝希
蟲懸秋髮射侯微
從今谷口榛中石
夜夜須防獵射歸

三生圖

三生石上性長存死別如何不斷魂
開卷故人還滿眼此情今更不堪論

劉單州棄官赴兄台州之喪

一手有急一手赴左不良行右須駐
人心取舍有重輕所以劉侯如脫兔
好官尚有兄則無死今不死孤不孤
久思古人今始見我欲書之寄董狐

王氏嘉遜齋

東山太傅寧無意少室遺公自得名
雨露四簷天尺五

未應嘉遜了平生

送洪子蘭奉使歸高麗

青禁虛心待上賓
鋒車就遣過庭人
龍城

遼東廣寧府

日近

歸裝暖玉署花寒
別夢新洗馬陳情
曾有表乘軺拜慶
古無倫
天東嘉樹知多少
喬梓如今最得春

寄題韓雲卿漁莊

太行之陽有盤谷
別有漁莊在東麓
基雲匠月三十年
突兀眼前成此屋
汲中明府昌黎公
平生往哲將無同

愛山未辦茅一把且種五柳搖高風只今盤盤知幾礎
堂構殷勤遵雅素玉龍擎重棟梁新不數王家老槐樹
門前洹水行漁舫沙平浦遠無驚濤天開圖畫屏周遭
秋風蘋蓼春風桃蹙芳拾翠輟所操月明舉網登銀刀
侑以大白湘溪毛醉看太行首獨搔長歌歎乃清而豪
聲飛于天鶴九臯喚歸羽儀萬仙曹天闕虎豹不敢嘯
太清雲翳無纖毫此時此屋更突兀午橋花竹中天高

送程君雋學正歸潯陽

五老催歸客天寒道路長殘冬涉易水幾日到潯陽學
見吾宗盛身隨聖道昌未應嗟晚達松菊近柴桑

郝氏世德詩

啓漢優三略興周冠九人王功今古在侯服歲時新奮
建名相亞臯夔德有隣向來忠孝傳彌覺眼前真

申屠大用挽詞

故人為別幾秋風竟爾難尋一笑同表表自能尊素學
行行都憶避青驄殊亭雪捲詩初換壁社珠移事已空

老我只今看宿草短章那更後諸公

榮歸亭

昌邑淮陰欠此亭繡衣高映鐵衣明至今無限遺榮在
玉樹欣欣遶砌生

王秋澗先生挽詞二首

六藝流名舊諸生屬意深雄文探虎穴妙墨過雞林不
朽絲綸重無端齒髮侵故應持斧日早有挂冠心

解瑟清王度馳環聚老臣江關聲氣合輦路笑言親玄

住猶如夢存亡已隔塵獨餘秋澗水顧影一傷神

華隱

御風來往不留塵水墨何由染此身我亦平生一丘壑
幾時間似畫中人

漁翁圖

漁翁牽纜漁婦紡膝上兒看棹車響溪南溪北趁冬晴
水急船多欠新網祝兒休啼手正忙網成得魚如汝長

枯木

野樹無心綠寒鴉作意飛向來回首處疑是復疑非

危橋

危橋那可試獨步更堪驚不見當時畫空懸異日情

樗亭

幸免斧斤厄常驚歲月新少年欺擁腫老子愛輪囷

奉賀國王太傅丞相受封

龍飛天子答勲勞疊組重珪極袞褒周室同心惟呂伋
漢家異姓有張敖天垣斗極星辰貴烟閣雲臺地位高

千載國傳彞範舊好毗湯舜選伊臯

宣和畫馬

夜半房星下九關
渥洼龍種入天閑
宣和得此渾無用
神駿爭雄粉墨間

五王避暑圖

淮南恩少難為弟
有庠天回始念兄
得似開元全盛日
一樓華萼友于情

壽劉樗庵八十

名父佳兒世所希此身端合享期頤挂冠神武聊存我
序齒耆英復讓誰師呂不論千載上相周猶待十年遲
新求盛事人能說文獻公家好本支

寄劉中菴參政二首

不得劉公一紙書酒情詩思近何如太初岩下涼多少
亦有工夫燕坐無

河南父老望車音早有清風慰所臨他日劇談三太息
政應聊復試初心

中庵詞附

人至承以二絕句見貺清簡幽深情意都盡
披閱諷詠如接芝宇感慰可勝言哉輒有小
詞錄奉一笑且以寄企嚮之意云劉敏中上
短夢驚回北窓一陣芭蕉雨雨聲還住斜日明高樹
起望行雲送雨前山去山如霧斷虹猶怒直入山
深處

送李景山侍郎使安南

北戶之東旭日升容光必照破羣冥防風後至心何在
陸賈重來語可聽化洽不聞冬吠雪氣先遙想夜占星
交州九郡皆王略他日殷勤話所經

贈杭州開元宮王眉叟法師

星宮浮遊隨所躔上極玄始下九烟出沒無迹合自然
誰能居之惟列仙虎林之宮曰開元飛光躡景與時遷
我持絳節曾東靄仙人種杏邀我前翱翔接羽遊木天
雲庭坐詠太一篇赤明日月如千年方平羽駕初來還

黃姑去舍空瓊田超然而止開玄玄金堂玉室千萬間
玄中正炁迴靈淵洞真神章大帝頌九劫無始環中環
溪分素河月流灣至虛生白心甚閒又乘剛風九豹關
我欲從之不能攀青瑤為簡綠玉編託之胎禽寄飛軒
黃庭之師為我言東行何時相後先

李漁母八十詩三首

乳下孤兒已了官眼前銀鹿共盤桓欲知八十年間事
雪皎霜寒在鬢端

高門大扁里閭驚孝子慈孫女婦貞別有河東李渙母
不曾旌表衆知名

截髮供賓手斷機從來烈女有佳兒劉家中表熊家學
文采風流定可知

送完顏總管赴平陽

汾水西南古晉州雙旌五馬漢諸侯庭無坐吏官班重
地有遺民帝化留荆樹春風誇列土甘棠清蔭羨高秋
征騑莫嘆長安遠回首朝陽是薊丘

送何仲韞平章赴汴省

梁楚水川大半開懸知鈞軸載春來清都雨露流中土
左界星辰接上台別意謾言書數寄去思終見詔頻催
安輿翼翼鳴珂引夾路人爭拜老萊

題盧君用所藏手卷二首

己未御書小景

流落殘春筆名蹤定可知君王方旰食猶為一題詩

盧學士詩卷

渺渺瀟江遠年年桂樹秋空餘詩卷在天地與長留

寄壽張天師母周七十

雙鶴飛來墮碧牋上清金母慶希年惠風和暢先三日
南極逍遙自一天星逐馬蹄催遠使露分仙掌起初筵
從今歲月吾能測青子蟠桃色正鮮

送岳州馮道錄

夜半黃金化石頭洞中人向玉京遊丹砂欲度三千士
月斧先脩十二樓位託星辰須北拱道行江漢與東流

相逢紫極崔先叟為問秋聲好在不

題扇面

葫蘆纏蔓急菜葉鬪花妍為問將雛鳳丹成爾亦仙

踈山雲老半間三首

常住元無所住非空畢竟俱空長老半間何在問他明
月清風

三界十方周遍千門萬戶尋常喚取雲歸管業老僧自
有禪房

萬嶺松杉密密兩關雲氣深深會見重來矮佛樹生肘
上成林

賡牧庵與李仲元詩

世祖攬天下盈庭盡瑰奇聯翩萬國士慷慨皆已知嚴
嚴許文正扶道應昌期李君此時俱好學何常師駢肩
謁萬乘天光煥倫藝相顧各少壯自許涅不緇別來能
幾何歲月忽吾欺出入三十載嗟君位猶卑但聞德日
充足慰心所馳今上繼聖明左右豈一夔君方贊南省

厚祿我何裨還歸養病瘵暫與軒冕辭忽覽古人書恍
覲君子儀常恐前修業易為後世嗤君獨保厥初進退
各有為君如岩上松昭質終不虧我如道旁馬筋力今
已疲許公不可招諸老誰慙遺琅琅姚君篇傾倒無所
疑豈獨君所知而亦我所私因風繼斯作聊用豁余思

李仲元所藏畫卷

高人意在飛鴻外使者空餘立馬心可是涼州最知己
從今薤谷更須深

寄壽吳閒閒二親

東閣真人擁紫鸞來從帝所奉親歡
番君舊里開新國吳猛天仙拜地官
萬里罡風參玉佩百壺宮露輟金盤
華堂未覺秋香晚冰雪相看正耐看

山水圖

挺挺短長烟樹窈窕遠近雲岑為待
濟川舟楫江邊立到如今

趙克敬耘庵

瓮竇蓬樞慣田里雨笠風蓑親耒耜汗肩龜手剪蓬蒿
甌窶汙邪年高秭不應牛角挂書策誤引鶴書招祿仕
筆耕紙耨不堪煮飢啼寒號長滿耳君侯奕葉卿相家
小却鑿坡弄文史民庸吏績來奏最步玉登金不違咫
便當華屋開朱門車馬駢喧誇世美胡為宴坐立名字
踰我里兮折我杞大篇短章來羣公說古論今精義理
老儂了不辯許事擬買烏犍歸教子

遯軒

錦韉金絡玉花驄
血汗黃塵赤日中
何似茂林脩竹裏
陶家一枕北窓風

畫竹

生來有節照雲端
蒼雪崢嶸傲歲寒
欲問平安無便鴈
眼明一段碧琅玕

臨右軍帖

漏痕釵脚悞無神
空向墨池尋右軍
欲輟平生草玄手
為書一幅弔藤文

李庭訓御史挽詞

天為斯文地胡然奪此翁士林嗟博洽言路惜公忠
儒術今方貴書生命自窮箕裘有傳業積厚報須豐

趙閒閒畫松自題詩

詞華推哲匠才大古云難如許明堂具偏宜畫裏看

答陳玉峯覓紙帳

城南有詩老贈我意綿綿住久家猶客更長坐不眠
來尋白紙帳去敵紫茸氈我愧蘇司業賸酬欠酒錢

寧山耆父圖詩二首

桑陰柳影團圞坐
瓦鉢甌陸續傳名字
不須排甲乙
相忘相與作忘年

洛下耆英吾不見
香山九老昔曾摹
可憐白首明光殿
却羨五陵年少圖

題山水便面

烟水冥迷山遠近
高山臨水更清寒
畫樓迴倚風前構
商舶遙從海嶠還
雲起亂峯生巧思
鳥飛殘照入遐觀

生綃盈尺無窮意誰識經營慘淡間

吏部郎中韓希賢父九十叔八十六

及壯抽身下九天歸來兄弟伏生年古今人為功名老
福壽天於孝義偏松柏相看忘歲晚芝蘭競秀喜階前
二踈翻被黃金惱得似韓家二叟賢

七真山洞雲觀

七真之山白雲裏絳闕神宮半空起祁君有志于君成
更賜雄材自天子東臨滄海西崑崙森森翠節排天門

三更日射芙蓉色六月石挂冰霜痕山頭髣髴清虛府
洞底陰岑太行路青苔能識六龍車明月長懸萬年樹
峯盤澗復氣網縕瑶草金芝日日新君王自有長生藥
端拱無為萬國春

安山朱琰

聞說朱家擅二難安山山下大河干骨無疎戚還蒿里
地有膏腴築杏壇種德何曾期厚報服田猶恐抱空餐
力能掩骼仍興學誰信為農却了官

洞明祁真人像

簪笠蓑衣七尺翁
掀髯猶似舊相逢
只今無路隨青竹
自昔疑君是赤松
明月在天元不老
精金藏火豈能鎔
七真岩谷長春境
唯有浮雲盡日封

舜舉梨花折枝

粉面丹心淺絳襦
清明時候古城隅
一枝獨背春風老
盡日巡簷撚白鬚

舜舉黃蜀葵

淡黃衫子道家粧
露白風清殿衆芳
只有向陽心尚在
紛紛紅紫任低昂

送王景開長官

楊柳陰陰燕子春
東風萬里動游塵
還將碧澗紅泉夢
又送青原白鷺人
子壯有才須遠器
吾衰無計乞閒身
南歸若見沙鷗伴
莫道遲迴忘卜隣

厓雲

道人家住祝融尊
漘漘蒼蒼不可分
何日相從青壁下

焚香把酒看氤氲

雪樓集卷二十八